



Broj/ Број : 02/2-50-1-13-13-23/08  
Sarajevo/ Сарајево : 23.5.2008. godine

### **ZAPISNIK**

**13. sjednice Komisije za vanjsku i trgovinsku politiku,  
carine, saobraćaj i komunikacije  
Doma naroda  
Parlamentarne skupštine Bosne i Hercegovine,  
održane 14.5.2008. godine**

Sjednica Komisije za vanjsku i trgovinsku politiku, carine, saobraćaj i komunikacije Doma naroda Parlamentarne skupštine BiH počela je u 12.15 sati. Sjednicu Komisije sazvala je predsjedavajuća Komisije Alma Čolo.

Sjednici Komisije za vanjsku i trgovinsku politiku, carine, saobraćaj i komunikacije Doma naroda, u svojstvu članova Komisije, prisustvovali su: Alma Čolo, Adem Ibrahimpašić, Rudo Vidović, Dušanka Majkić i Slobodan Šaraba, te Nenad Pandurević, sekretar Komisije. Opravdano je odsustvovao Branko Zrno.

Sjednici su, u svojstvu predlagača i posmatrača, prisustvovali: Delivoje Đerić, predsjedavajući, Nino Ćorić i Fikret Gačanović, članovi Vijeća Agencije za Poštanski saobraćaj BiH, Lidija Vignjević, direktor Instituta za intelektualno vlasništvo BiH, Lamija Kozarić, direktorica Izvozno-kreditne agencije BiH, Sabrija Šerifović i Dušan Nešković, pomoćnici ministra vanjske trgovine i ekonomskih odnosa BiH, Biljana Čamur, pomoćnica ministra civilnih poslova BiH, Edin Šehić, šef Odsjeka, i Dag Đumurkčić, savjetnik u Ministarstvu vanjskih poslova BiH, Helena Tavra, stručni savjetnik u Ministarstvu pravde BiH, Minka Smajević, stručna savjetnica u Ministarstvu za ljudska prava i izbjeglice BiH i Urela Erceg iz Misije OSCE-a u BiH.

Nakon što je konstatirala da postoji kvorum, predsjedavajuća Komisije Alma Čolo predložila je dnevni red sjednice. Istakla je da za sjednicu predlaže dnevni red koji je ranije upućen članovima Komisije uz poziv za sjednicu, uz dopunu. Podsjetila je na dopis Kolegija Doma naroda PSBiH, od 8.5.2008., kojim je Komisija za vanjsku i trgovinsku politiku, carine, saobraćaj i komunikacije Doma naroda PSBiH zadužena da razmotri i pripremi prijedloge zaključaka delegata Doma naroda PSBiH predložene na 8. zajedničkoj sjednici oba doma PSBiH (u vezi s razmatranjem tačke: Poslovanje Javnog RTV servisa BiH i mjere za prevladavanje stanja utvrđenog revizorskim izvještajima o finansijskom poslovanju Javnog RTV servisa BiH za 2005. i 2006. godinu) za sjednicu Doma naroda koja će biti održana u četvrtak, 15. maja 2008. Shodno navedenom dopisu Kolegija, predsjedavajuća Komisije predložila je da se u odnosu na ranije predloženi dnevni red uz poziv za sjednicu doda kao nova posljednja tačka dnevnog reda: „Razmatranje prijedloga zaključaka delegata Doma naroda predloženih na 8. zajedničkoj sjednici oba doma PSBiH u vezi s razmatranjem tačke Poslovanje Javnog RTV servisa BiH i mjere za prevladavanje stanja utvrđenog revizorskim izvještajima o finansijskom poslovanju Javnog RTV servisa BiH za 2005. i 2006. godinu”.

Pored toga, predsjedavajuća Komisije predložila je da se tačka 2. Razmatranje Prijedloga zakona o poljoprivredi, ishrani i ruralnom razvoju BiH, razmatra kao tačka 4. te da se tačke 3. i 4. koje se odnose na razmatranje izvještaja o radu Agencije za poštanski saobraćaj BiH, odnosno Izvozno-kreditne agencije BiH, razmatraju kao tačke 2. i 3., kako bi se izašlo u susret predstavnicima ovih institucija s obzirom da je bilo sasvim izvjesno da će rasprava o Prijedlogu zakona o poljoprivredi, ishrani i ruralnom razvoju BiH zahtijevati više vremena. Nakon toga, predsjedavajuća Komisije Alma Čolo je, za 13. sjednicu Komisije, predložila sljedeći

## DNEVNI RED

1. Usvajanje Zapisnika 12. sjednice Komisije za vanjsku i trgovinsku politiku, carine, saobraćaj i komunikacije Doma naroda Parlamentarne skupštine BiH i Zapisnika zajedničke sjednice s Komisijom za vanjske poslove Predstavničkog doma, održane 22.4.2008.;
2. Razmatranje Izvještaja o radu i finansijskog izvještaja Agencije za poštanski saobraćaj BiH za 2007. godinu;
3. Razmatranje Izvještaja o radu Upravnog odbora Izvozno-kreditne agencije BiH za 2007.;
4. Razmatranje Prijedloga zakona o poljoprivredi, ishrani i ruralnom razvoju BiH (druga komisijska faza), predlagač: Vijeće ministara BiH;
5. Razmatranje Programa mjera Vijeća ministara BiH za primjenu Sporazuma CEFTA;
6. Davanje saglasnosti za ratifikaciju Fakultativnog protokola uz Konvenciju protiv mučenja i drugih okrutnih, neljudskih ili ponižavajućih postupaka ili kažnjavanja;
7. Davanje saglasnosti za ratifikaciju Konvencije o pristupu informacijama, učešću javnosti u odlučivanju i pristupu pravdi u pitanjima okoliša – Aarhus, Danska, 25. juni 1998.;
8. Davanje saglasnosti za ratifikaciju Sporazuma o saradnji u oblasti odbrane između Vijeća ministara BiH i Vlade Republike Grčke;
9. Davanje saglasnosti za ratifikaciju Okvirnog sporazuma između Bosne i Hercegovine i Evropske investicione banke kojim se reguliraju aktivnosti Evropske investicione banke u Bosni i Hercegovini;
10. Davanje saglasnosti za ratifikaciju Sporazuma o kreditu između Bosne i Hercegovine, koju zastupa Ministarstvo finansija i trezora BiH, i Bank Austria Creditanstalt AG – Projekat rekonstrukcije i proširenja vodovodnog sistema u općini Posušje;
11. Davanje saglasnosti za ratifikaciju Ugovora o zajmu – Reorganizacija projekta obnove elektroenergetskog sistema - između Bosne i Hercegovine i Evropske banke za obnovu i razvoj;
12. Davanje saglasnosti za ratifikaciju Ugovora o amandmanu - kojim se vrše izmjene i dopune Ugovora o zajmu od 2. novembra 2000., amandmanima od 5. decembra 2001. i 23. februara 2004. – između Bosne i Hercegovine i Evropske banke za obnovu i razvoj;
13. Davanje saglasnosti za ratifikaciju Strazburškog sporazuma o međunarodnoj klasifikaciji patenata, zaključenog 24. marta 1971., izmijenjenog 28. septembra 1979.;
14. Davanje saglasnosti za ratifikaciju Evropske konvencije o nezastarijevanju zločina protiv čovječnosti i ratnih zločina, Strazbur, 25. januar 1974.;
15. Davanje saglasnosti za ratifikaciju Konvencije o zaštiti nematerijalnog kulturnog naslijeđa (UNESCO), Pariz, 17. oktobar 2003.;
16. Razmatranje informativnog dokumenta Vijeća Evrope - Bosna i Hercegovina: Izvršavanje obaveza i provođenje postprijemnog programa saradnje;
17. Razmatranje izvještaja s putovanja:
  - a) Izvještaja o bilateralnoj posjeti delegacije Parlamentarne skupštine BiH Nacionalnoj skupštini Republike Kube, od 22. do 26.3.2008.;
  - b) Izvještaja o učešću na Crans Montana Forumu u Bahreinu, od 7. do 11.4.2008.;

18. Tekuća pitanja:

- Razmatranje informacije Ministarstva vanjskih poslova BiH o proceduri zaključivanja Sporazuma o stabilizaciji i pridruživanju (prije i nakon potpisivanja, odnosno stupanja Sporazuma na snagu).

19. Razmatranje prijedloga zaključaka delegata u Domu naroda, predloženih na 8. zajedničkoj sjednici oba doma PSBiH, u vezi s razmatranjem tačke: Poslovanje Javnog RTV servisa BiH i mjere za prevladavanje stanja utvrđenog revizorskim izvještajima o finansijskom poslovanju Javnog RTV servisa BiH za 2005. i 2006. godinu.

*Predloženi dnevni red usvojen je jednoglasno.*

**Ad.1. Usvajanje Zapisnika 12. sjednice Komisije za vanjsku i trgovinsku politiku, carine, saobraćaj i komunikacije Doma naroda Parlamentarne skupštine BiH i Zapisnika zajedničke sjednice s Komisijom za vanjske poslove Predstavničkog doma, održane 22.4.2008**

*Zapisnici su jednoglasno usvojeni.*

**Ad.2. Razmatranje Izvještaja o radu i finansijskog izvještaja Agencije za poštanski saobraćaj BiH za 2007. godinu**

Kratko obrazloženje o Izvještaju podnio je Delivoje Đerić, predsjedavajući Vijeća Agencije za poštanski saobraćaj Bosne i Hercegovine. Istakao je da sjednici prisustvuju sva tri člana Vijeća Agencije, uz njega, još dva člana Nino Ćorić i Fikret Gačanović. Podsjetio je na zakonsku obavezu Agencije za poštanski saobraćaj BiH a koja je utvrđena Zakonom o poštama BiH, da po završetku svake poslovne godine, Vijeću ministara BiH i Parlamentarnoj skupštini BiH dostavlja izvještaj o radu, uključujući i finansijski izvještaj. Dodao je da je Izvještaj usvojilo Vijeće ministara BiH i Predstavnički dom PSBiH.

U nastavku je ukazao na probleme s kojima se Agencija suočavala u prvoj godini rada, poput određivanja sjedišta Agencije, registracije, stvaranja preduslova za izdavanje licenci s obzirom da je to glavni izvor prihoda Agencije, iznalaženja smještajnog prostora, kadrovske i tehničke opremanje i sl. Međutim, dodao je da je većina tih problema prevaziđena ili su aktivnosti na njihovom prevazilaženju u toku.

Nakon diskusije Rude Vidovića u kojoj je istakao potrebu da se pruži puna podrška u prevazilaženju početnih problema kako bi u što skorije vrijeme Agencija ostvarila punu tehničku i kadrovsku opremljenost a time i punu efikasnost u radu, Komisija je jednoglasno prihvatila *zaključak da se Domu naroda PSBiH predloži da usvoji Izvještaj o radu i finansijski izvještaj Agencije za poštanski saobraćaj BiH za 2007. godinu.*

**Ad.3. Razmatranje Izvještaja o radu Upravnog odbora Izvozno-kreditne agencije BiH za 2007.**

Na početku je predsjedavajuća Komisije Alma Čolo podsjetila na zakonsku obavezu dostavljanja izvještaja koja je propisana članom 14. Zakona o izvozno-kreditnoj agenciji BiH, kojim je predviđeno da je Upravni odbor dužan Vijeću ministara BiH i Parlamentarnoj skupštini BiH dostaviti izvještaj o svom radu najmanje jednom godišnje. Dodala je da je Izvještaj usvojilo Vijeće ministara BiH i Predstavnički dom PSBiH.

Kratko obrazloženje Izvještaja podnijela je direktorica Izvozno-kreditne agencije (IGA) Lamija Kozarić. Na početku je istakla da, nažalost, niko od članova Upravnog odbora, zbog drugih neodgovornih obaveza, nije bio u mogućnosti prisustvovati sjednici, tako da umjesto njih ona prisustvuje sjednici. Istakla je da Agencija postoji već 12 godina ali kao Izvozno-kreditna agencija postoji od 2004. godine, kada je PSBiH usvojila Zakon o Izvozno-kreditnoj agenciji BiH. Agencija je imala prilično uspješnu prethodnu godinu, ali se se već sada suočava s nedostatkom sredstava da bi se odgovorilo na sve zahtjeve. Agencija pruža usluge kreditiranja, osiguranja, faktoringa i garancija izvoznicima ali i domaćim trgovinskim preduzećima. Ukupna vrijednost pruženih usluga u 2007. godini iznosi 212 miliona KM.

U svom obraćanju, druga zamjenica predsjedavajuće Dušanka Majkić posebno je naglasila da Izvještaj ne sadrži, a trebalo bi svakako da sadrži, podatke o privrednim granama i subjektima koji su koristili pomoć Agencije. Tačnije, nedostaje analiza u kojoj mjeri je rad ove agencije uticao na rast pokrivenosti uvoza izvozom, imajući na umu koliko je to krupan problem ove zemlje. S obzirom na rezultate u prethodnoj godini, kao i na sposobnost Agencije iskazanu u Izvještaju da svaki mjesec obezbjedi osiguranje za 7 miliona KM izvoza, uloga Agencije na tom polju može biti veoma velika.

U odgovoru je direktorica Agencije naglasila da je rukovodstvo Agencije pripremlilo izvještaj koji se odnosi na tu temu, ali da on nije postao sastavni dio glavnog izvještaja, smatrajući da akcenat treba staviti na rad Upravnog odbora IGA-e. Podržan je, prije svega, metalski i drveni sektor te izvođači radova u inozemstvu, mada su skoro svi značajniji izvoznici korisnici usluga IGA-e. Pored postojećih usluga, istakla je da bi IGA ubuduće trebalo više da se angažira na poslovima osiguranja naplate potraživanja, da bi time pomogla našim firmama da izađu na neka nova tržišta.

Dalje je istakla da je tih 212 miliona ukupno podržani izvoz dok je ukupni kapital IGA-e 56 miliona KM i to su sredstva iz kredita Svjetske banke. Pomoću tih sredstava, dakle kroz razne instrumente leveridža, npr. radeći s Loyd osiguranjem na osiguravanju garancija i slično, IGA je osigurala podršku izvozu u navedenom iznosu. Znači, ukupni kapital IGA-e je 56 miliona KM i ta sredstva postaju nedovoljna za sve potrebe izvoznika. Dodatni problem je što, po zakonu, IGA ne može primati depozite. Da bi značajnije pomogla izvoznicima IGA bi trebalo da poveća postojeća sredstva. Značajno povećanje bilo bi osigurano samo kada bi se u Zakon unijela odredba da „IGA nastupa u ime i za račun BiH“. Jer, IGA je sada organizirana kao društvo s ograničenom odgovornošću, što znači da odgovara samo do visine svojih sredstava.

Dušanka Majkić konstatirala je da je evidentno da IGA pomaže bh. izvoznike, ali da to nije dovoljno i da bi u tom smislu svakako trebalo da se uputi inicijativa Vijeću ministara BiH da se povećaju kapaciteti IGA-e kako bi značajnije mogla podržati bh. izvoz. Predložila je da Komisija uputi Domu naroda prijedlog da se Izvještaj prihvati, ali uz zaključak da se od Vijeća ministara BiH traži da izvrši povećanje sredstava IGA-e, te da se u naredni izvještaj svakako uključi pregled sektora i subjekata koji su koristili sredstva IGA-e.

U svom izlaganju Adem Ibrahimpašić podržao je izvještaj i predložio da Komisija predloži da Dom naroda PSBiH donese zaključak kojim će zatražiti od Vijeća ministara BiH da preduzme aktivnosti za povećanje boniteta Izvozno-kreditne agencije, ili izmjenama zakona ili dokapitalizacijom, ili i jedno i drugo.

Nakon rasprave, Komisija za vanjsku i trgovinsku politiku, carine, saobraćaj i komunikacije Doma naroda Parlamentarne skupštine BiH, jednoglasno je odlučila da predloži Domu naroda da donese sljedeće zaključke:

1. Usvaja se Izvještaj o radu Upravnog odbora Izvozno-kreditne agencije BiH za 2007. godinu.
2. Zadužuje se Vijeće ministara BiH da s ciljem daljnjeg stimuliranja izvoza razmotri mogućnost povećanja finansijskih kapaciteta Izvozno-kreditne agencije BiH direktnom finansijskom podrškom i/ili izmjenama Zakona o Izvozno-kreditnoj agenciji BiH.
3. Zadužuje se Upravni odbor Izvozno-kreditne agencije BiH da u narednom izvještaju Parlamentarnoj skupštini BiH uvrsti informacije o privrednim granama i subjektima koji su koristili podršku Izvozno-kreditne agencije BiH.

#### **Ad.4. Razmatranje Prijedloga zakona o poljoprivredi, ishrani i ruralnom razvoju BiH (druga komisijska faza), predlagač: Vijeće ministara BiH**

O Prijedlogu zakona raspravljalo se u drugoj komisijskoj fazi, u skladu s odredbama članova 103. i 104. Poslovnika Doma naroda. Predsjedavajuća Komisije konstatirala je da su na Prijedlog zakona amandmane uložili delegati Dušanka Majkić – 14 amandmana i Slobodan Šaraba – 8 amandmana.

Dušanka Majkić je u amandmanskoj fazi uložila sljedeće amandmane:

##### **AMANDMAN I.**

U članu 8. (Nadležnosti organa entiteta i Brčko Distrikta BiH), u tački a) brišu se riječi: „odgovorni su za“, a riječ „implementaciju“ zamjenjuje se riječju „implementacija“.

U istom članu tačka b) mijenja se i glasi: „b) usklađuju svoje strategije, akcione planove, politike, programe, zakone i druge propise u skladu s utvrđenim okvirima BiH“.

##### **AMANDMAN II.**

U članu 10. (Upravne organizacije u sastavu Ministarstva), stav (1) tačka c) briše se.

##### **AMANDMAN III.**

U članu 12. (Ruralni razvoj), stav (13) tačka e) brišu se riječi: „u saradnji s Upravom za harmonizaciju (koja je određena članom 13. ovog zakona)“.

U istom stavu tačka g) mijenja se i glasi: „g) razvija i provodi efektivni sistem monitoringa i evaluacije programa ruralnog razvoja putem grupe za monitoring ruralnog razvoja koju čine predstavnici entiteta i Brčko Distrikta BiH“.

U tački h) na početku teksta dodaju se riječi: „u saradnji s nadležnim organima entiteta i Brčko Distrikta BiH“.

##### **AMANDMAN IV.**

Član 13. (Uprava za harmonizaciju sistema plaćanja) mijenja se i glasi:

„ Član 13.

(Odgovornost i obaveze za harmonizaciju i sistem plaćanja)

(1) S ciljem osiguranja harmonizacije sistema plaćanja koje obavljaju nadležni organi entiteta i Brčko Distrikta BiH, u svrhu podrške mjerama politike u sektoru poljoprivrede, ishrane i

ruralnog razvoja, Ministarstvo je odgovorno za dosljednost, transparentnost i koordinaciju sistema plaćanja.

- (2) S ciljem jačanja i harmoniziranja postojećih sistema plaćanja, praksi i procedura u entitetima i Brčko Distriktu BiH, Ministarstvo obavlja sljedeće zadatke:
- a) u saradnji s nadležnim organima entitetima i Brčko Distrikta BiH, razvija pravni okvir za uspostavljanje i razvoj institucionalnih struktura za podršku u provođenju mjera politike privlačenja sredstava EU i sredstava iz drugih međunarodnih fondova;
  - b) uspostavljanja jedinstvene prakse i procedure funkcija odobravanja, izvršenja i računovodstvenih transakcija u sektoru poljoprivrede, ishrane i ruralnog razvoja, koje će biti primijenjene u entitetima i Brčko Distriktu BiH;
  - c) usaglašava sistem upravne kontrole u saradnji s nadležnim organima entiteta i Brčko Distrikta BiH, koji će osigurati transparentnost i dostupnost podataka o svim mjerama podrške i isplata;
  - d) u saradnji s nadležnim organima entiteta i Brčko Distrikta BiH, uspostavlja funkcije kontrole;
  - e) promovira ujednačenu primjenu procedura za isplate i zahtjeve na svim nivoima, a koji su u skladu s pravilima EU;
  - f) koordinira obuku osoblja na svim nivoima kako bi se osigurala jedinstvena primjena procedura i ispravno provođenje mjera;
  - g) pruža pomoć u uspostavljanju registra iz člana 15. ovog zakona, i drugih evidencija i koordinira rad odgovarajućih službi tehničkih timova na svim nivoima u svrhu konzistentne primjene sistema referentne registracije i sistema skladištenja podataka u okviru sveobuhvatnog tehničkog okvira;
  - h) ostvaruje komunikaciju s platnim organizacijama i drugim internim i eksternim organima u pogledu procedura i razmjene podataka u statističke i druge svrhe po zahtjevu;
  - i) uspostavlja efektivni harmoniziran sistem monitoringa i evaluacije u skladu s najboljom evropskom praksom;
  - j) identificira i pomaže u razvoju drugih relevantnih službi s ciljem promoviranja poljoprivrednih i prehrambenih proizvoda;
  - k) identificira i pomaže u razvoju i provođenju mjera uvoznog-izvoznog režima i intervencije na tržištu.

#### **AMANDMAN V.**

Član 14. (Zadaci Uprave za harmonizaciju) briše se.

#### **AMANDMAN VI.**

Član 17. (Statistike i informacije u poljoprivredi) mijenja se i glasi:

„Član 17.

(Statistike i informacije u poljoprivredi)

S ciljem osiguranja, preciznih, vjerodostojnih i ažuriranih podataka i drugih informacija u poljoprivredi, Ministarstvo će uspostaviti posebnu organizacionu jedinicu za koordinaciju informacija, koja obavlja sljedeće poslove:

- a) koordinira postepeno uvođenje informacionog sistema u poljoprivredi u skladu s EU;
- b) koordinira razvoj harmoniziranih informacionih sistema u poljoprivredi u BiH;
- c) koordinira između različitih struktura koje rade na pitanjima statistike u poljoprivredi i službama informiranja na svim nivoima;
- d) uspostavlja i osigurava korištenje zajedničkih standarda i metodologija za prikupljanje statističkih podataka, te ih objedinjava i širi, uključujući redovno publiciranje na svim nivoima uprave u saradnji s nadležnim organima;

- e) uspostavlja, koordinira i određuje odgovornosti specifičnih tehničkih radnih grupa s ciljem podrške radu Jedinice;
- f) koordinira s Agencijom za statistiku BiH, entiteta i Brčko Distrikta BiH, te EUROSTAT-om u razvoju informacionih sistema u sektoru;
- g) uspostavlja sinergije s drugim aktivnostima (projektima i programima) u poljoprivredi i statistici, ako se zahtijeva.

#### **AMANDMAN VII.**

U članu 18. (Poljoprivredni tržišni informacioni servis) stav (1) iza riječi "uspostavlja" dodaju se riječi: „u saradnji s nadležnim organima entiteta i Brčko Distrikta BiH“.

#### **AMANDMAN VIII.**

U članu 19. (Savjetodavno vijeće) stav (1) riječi: „Ministarstvo uspostavlja“ zamjenjuju se riječima: „osniva se“.

#### **AMANDMAN IX.**

U članu 20. (Savjetodavne službe u sektoru) stav (3) riječi: „na način određen od Uprave za harmonizaciju“ brišu se.

#### **AMANDMAN X.**

U članu 21. (Referentne laboratorije i druga tijela za testiranje) u st. (1) i (3) iza riječi „Ministarstvo“, dodaju se riječi: „u saradnji s nadležnim organima entiteta i Brčko Distrikta BiH“.

U stavu (2), iza riječi: „izvan BiH“ dodaju se riječi: „samo ako takve laboratorije ne postoje u BiH“.

#### **AMANDMAN XI.**

U članu 23. (Monitoring i evaluacija) stav (1) riječi: „Ministarstvo uspostavlja“ zamjenjuju se riječima: „Ministarstvo i nadležni organi entiteta i Brčko Distrikta BiH uspostavljaju“, a riječ „slijedi“ zamjenjuje se riječju „slijede“.

U stavu (4) riječi: „odgovarajućim organima uprave“ zamjenjuju se riječima: „svim nivoima uprave u sektoru poljoprivrede, ishrane i ruralnog razvoja u BiH“.

#### **AMANDMAN XII.**

U članu 24. (Godišnji izvještaji BiH u sektoru) stav (3), iza riječi: „izvještaj“ dodaju se riječi: „usaglašen s nadležnim organima entiteta i Brčko Distrikta BiH“.

U stavu (4) riječi: „su obavezni da“ brišu se.

Stav (6) briše se.

### **AMANDMAN XIII.**

U članu 25. (Upravni i inspekcijски nadzor) stav (2) mijenja se i glasi: „(2) Inspekcijски nadzor nad primjenom ovog zakona i propisa donesenih na osnovu njega obavljaju nadležni organi entiteta i Brčko Distrikta BiH preko nadležnih inspekcijских službi“.

Stav (3) mijenja se i glasi: „(3) Ministarstvo u saradnji s nadležnim organima entiteta i Brčko Distrikta BiH osigurava redovnu obuku inspektora i jedinstvenu primjenu procedura rada i mjera u sektoru poljoprivrede, ishrane i ruralnog razvoja u skladu sa zahtjevima integracije u EU“.

Stav (4) briše se.

Stav (5) postaje stav (4).

### **AMANDMAN XIV.**

U članu 26. (Rok za donošenje propisa i uspostavljanje institucija) stav (6), iza riječi: „Ministarstvo će“ dodaju se riječi: „u saradnji s nadležnim organima entiteta i Brčko Distrikta BiH“.

Stav (7) briše se.

O predloženim amandmanima, u ime predlagača Zakona, svoj komentar dao je Dušan Nešković, pomoćnik ministra u Sektoru za poljoprivredu, ishranu, šumarstvo i ruralni razvoj u Ministarstvu vanjske trgovine i ekonomskih odnosa BiH. Istako je da su amandmani IV., V., VII., VIII. i XIII. u cijelosti prihvatljivi za Ministarstvo i da su identični amandmani već prihvaćeni u Predstavničkom domu PSBiH. Amandmani I., XII. i XIV., međutim, u cijelosti su neprihvatljivi za Ministarstvo kao predlagača Zakona. Ostali amandmani djelimično su prihvatljivi i djelimično su već sadržani u amandmanima prihvaćenim u Predstavničkom domu PSBiH.

*U nastavku se Komisija izjašnjava o svakom podnesenom amandmanu Dušanke Majkić i jednoglasno prihvatila amandmane IV., V., VII., VIII. i XIII., a ostale amandmane jednoglasno je odbila.*

Dušanka Majkić je, na osnovu odredbi člana 103. Poslovnika Doma naroda, na sjednici uložila šest novih amandmana. Istakla je da se radi o identičnim amandmanima koji su već prihvaćeni u Predstavničkom domu PSBiH. Predloženi su sljedeći amandmani:

#### **AMANDMAN I.**

U članu 10. (Upravne organizacije u sastavu Ministarstva) stav (1) tačka c) mijenja se i glasi: “Ured za harmonizaciju i koordinaciju sistema plaćanja,,

Kroz cijeli tekst Zakona u različitim padežima riječi: „Uprava za harmonizaciju sistema plaćanja“ zamjenjuju se riječima: „Ured za harmonizaciju i koordinaciju sistema plaćanja,,

#### **AMANDMAN II.**

U članu 12. (Ruralni razvoj) stav (13) tačka e) iza riječi: „saradnji sa“ dodaju se riječi: “Uredom za harmonizaciju i koordinaciju sistema plaćanja“, a preostali dio teksta briše se.



U tački h) ispred riječi „priprema“ dodaju se riječi: "u saradnji s nadležnim organima entiteta i Brčko Distrikta BiH", a ostali dio teksta nastavlja se.

### **AMANDMAN III.**

U članu 17. (Statistike i informacije u poljoprivredi) riječ: „Komitet“, u različitim padežima, zamjenjuje se riječju „Odbor“.

U stavu (1) tački h) riječi: “uspostavljanje sinergija” zamjenjuju se riječima: “usklađenost u radu”, a preostali dio teksta nastavlja se.

### **AMANDMAN IV.**

U članu 20.(Savjetodavne službe u sektoru) stav (3) riječi: „Uprave za harmonizaciju“ zamjenjuju se riječima: “Ureda za harmonizaciju i koordinaciju sistema plaćanja”, a ostali dio teksta nastavlja se.

### **AMANDMAN V.**

U članu 21. (Referentne laboratorije i druga tijela za testiranje) stav (2) mijenja se i glasi: “Ministarstvo ima pravo da određene zadatke povjerava laboratorijama izvan BiH, ako one ne postoje u BiH”.

### **AMANDMAN VI.**

U članu 23. (Monitoring i evaluacija) stav (1) mijenja se i glasi: “ (1) Ministarstvo, u saradnji s nadležnim organima entiteta i Brčko Distrikta BiH, uspostavlja sistem monitoringa i evaluacije BiH za sektor i slijede smjernice i najbolje prakse EU kojima se progresivno uvodi Zajednički okvir za monitoring i evaluaciju EU”.

*Komisija je pojedinačno glasala o svakom amandmanu i sve jednoglasno prihvatila.*

Slobodan Šaraba podnio je osam amandmana, i to:

### **AMANDMAN I.**

U članu 7. (Nadležnosti Ministarstva) tač. a) i m) mijenjaju se i glase: “a) Na osnovu utvrđenih agroekonomskih politika entiteta i Brčko Distrikta utvrđuje se okvir agroekonomske politike BiH; m) osigurava stalnu konsultaciju svih inspeksijskih službi u sektoru poljoprivrede”.

### **AMANDMAN II.**

U članu 8. (Nadležnosti organa entiteta i Brčko Distrikta BiH) tačka b) mijenja se i glasi: „b) Usklađuju svoje strategije razvoja poljoprivrede koje predstavljaju okvir za izradu Strategije razvoja poljoprivrede BiH”.

### **AMANDMAN III.**

U članu 9. (Nadležnosti kantona i općina) tačka a) riječi: „planovima BiH i entiteta“ mijenjaju se riječima: „planom razvoja poljoprivrede entiteta a koja je usklađena s razvojem poljoprivrede“.

### **AMANDMAN IV.**

U članu 12. (Ruralni razvoj) stav (1) mijenja se i glasi: „ (1) Osnove za realizaciju politike ruralnog razvoja BiH određuju se strateškim planom ruralnog razvoja entiteta i Brčko Distrikta.

Stav (3) mijenja se i glasi:“ (2) Strateški plan entiteta i Brčko Distrikta usklađuje Interresorna komisija sastavljena od predstavnika entiteta i Brčko Distrikta. Takav usklađeni plan predstavlja Strateški plan BiH“.

U stavu (6) rečenica iza riječi „Brčko Distrikta“ briše se.

### **AMANDMAN V.**

U članu 19. (Savjetodavno vijeće) stav (3), iza riječi „institucija“ dodaju se riječi: „i drugih stručnjaka iz oblasti poljoprivrede“.

### **AMANDMAN VI.**

U članu 21. (Referentne laboratorije i druga tijela za testiranje) st. (3) i (5) brišu se.

### **AMANDMAN VII.**

U članu 25. (Upravni i inspekcijski nadzor) st. (1) i (2) brišu se.

### **AMANDMAN VIII.**

U članu 26. (Rok za donošenje propisa i uspostavljanje institucija) stav (2) briše se.

*Komisija se pojedinačno izjašnjavala o podnesenim amandmanima i, sa dva glasa „za“ i tri glasa „protiv“, odbila svih osam amandmana.*

U nastavku je predsjedavajuća Komisije Alma Čolo, shodno odredbama člana 103. Poslovnika Doma naroda, predložila šest potpuno novih amandmana. Istakla je da se radi o amandmanima prihvaćenim u Predstavničkom domu, te da ih ulaže kako bi se identičan tekst zakona usvojio i u Domu naroda PSBiH. Predloženi su sljedeći amandmani:

### **AMANDMAN I.**

U članu 1. (Predmet) stav (1) iza tačke d) dodaje se nova tačka e) koja glasi: „e) utvrdi okvirne ciljeve sektora poljoprivrede i ruralnog razvoja i definira okvirne mjere koje su potrebne za njihovo ostvarenje“.

## AMANDMAN II.

U članu 3. (Značenje pojedinih izraza) tačka c) mijenja se i glasi: „c) “Poljoprivredno gazdinstvo” podrazumijeva proizvodnu jedinicu, i s tehničkog i privrednog gledišta, kojom se jednoobrazno rukovodi i koja se bavi proizvodnjom poljoprivrednih proizvoda; ili održava zemljište, koje se više ne koristi za proizvodnju, u dobrom poljoprivrednom i okolišnom stanju. Gazdinstvo se može baviti i drugim dodatnim (nepoljoprivrednim) proizvodnim i uslužnim djelatnostima“.

U ostalom dijelu teksta Zakona uskladiti terminologiju kao u tački c) u različitim padežima.

U tački i) iza riječi: “diverzificiranja” dodati riječ: “raznolikosti” u zagradi.

Iza tačke l) dodaju se nove tačke :“m), n), o) i p)” koje glase:

“m) “Ishrana“ podrazumijeva pristup i raspoloživost visokokvalitetne i zdravstveno ispravne hrane, odnosno svake materije ili proizvoda prerađenog, djelimično prerađenog ili neprerađenog, a namijenjenog konzumiranju ljudi ili se može očekivati da će ga ljudi konzumirati i odnosi se na sve proizvode agroindustrijskog kompleksa od njive do trpeze.

n) „Autohtona vrsta i pasmine životinja“ podrazumijeva skup životinja iste vrste, koje se, zbog zajedničkog porijekla i prilagođavanja specifičnim životnim prilikama, međusobno podudaraju u značajnim pasminskim oznakama i svojstvima, morfološke i fiziološke prirode. Ta svojstva životinje jedne pasminske grupe moraju sigurno prenositi na svoje potomstvo.

o) „Tradicionalna proizvodnja i tradicionalni proizvod na bazi biljnih i životinjskih komponenti“ podrazumijeva proizvodnju biljnih, životinjskih i proizvoda na bazi bilja i životinjskih supstanci, koja se, u odnosu na konvencionalnu proizvodnju, razlikuje po načinu proizvodnog procesa, a u skladu s dobrom proizvođačkom praksom i bez obzira na mjesto porijekla.

Tradicionalni proizvod je proizvod koji, u odnosu na slične proizvode iste kategorije, ima karakteristike koje ga razlikuju od ostalih konvencionalnih proizvoda, bez obzira na mjesto porijekla. Tradicionalni proizvod mora biti sačinjen od tradicionalne sirovine ili imati tradicionalan sastav ili tradicionalan način proizvodnje i/ili prerade.

p)“ Sljedivost (mogućnost praćenja)” je mogućnost ulaženja u trag hrani, hrani za životinje, životinji koja proizvodi hranu, odnosno služi za proizvodnju hrane, sirovini ili materiji koja je namijenjena ugrađivanju ili se očekuje da će biti ugrađena u hranu ili hranu za životinje, kroz sve faze proizvodnje, prerade i distribucije.“

## AMANDMAN III.

Član 4. (Osnovni sektorski ciljevi) stav (1) tačka a) mijenja se i glasi: „a) aktiviranje neiskorištenih prirodnih i ljudskih resursa, razvoj održivog, konkurentnog i dinamičnog sektora poljoprivrede, šumarstva i ishrane.“

Iza tačke a) dodaje se nova tačka b) koja glasi: „b) povećanje stepena zadovoljavanja potreba stanovništva vlastitom hranom i supstitucija uvoza hrane domaćom proizvodnjom za koju postoje prirodni i drugi uslovi te smanjenje vanjskotrgovinskog deficita poljoprivredno-prehrambenih proizvoda“.

Dosadašnje tačke b), c), d) i e) postaju tačke c), d), e) i f).

Iza tačke f) dodaje se nova tačka g) koja glasi: „g) omogućavanje primjerenog životnog standarda i pridonosenje stabilnosti poljoprivrednog dohotka i prehrambene sigurnosti stanovništva koje se podmiruje u što većoj mjeri domaćim konkurentnim poljoprivrednim proizvodima“.

#### AMANDMAN IV.

U članu 15. (Registri) stav (1) tačka b) u drugoj rečenici između riječi: "pravnih i/ili fizičkih lica" brisati rastavni veznik: "ili".

U stavu (5) između riječi: "fizička ili pravna", veznik: "ili" briše se i zamjenjuje sastavnim veznikom "i".

#### AMANDMAN V.

U članu 22. (Robne rezerve na entitetskom i kantonalnom nivou) stav (1) riječi: "(u daljnjem tekstu: rezerve)" zamjenjuje se riječima: "(u daljnjem tekstu: robne rezerve)".

U st. (2), (3) i (4), riječ "rezerve" zamjenjuje se riječima: "robne rezerve" u različitim padežima.

#### AMANDMAN VI.

U članu 26. (Rok za donošenje propisa i uspostavljanja institucija) stav (2) iza riječi "sredstva" riječi: "po stupanju na snagu ovog zakona" brišu se i zamjenjuju riječima: "u roku od godinu dana od dana stupanja na snagu ovog zakona".

U stavu (3) iza riječi: "druge propise" dodaju se riječi: "u roku od godinu dana".

U stavu (5) riječi: "po stupanju na snagu ovog zakona" brišu se i zamjenjuju riječima: "u roku od godinu dana od dana stupanja na snagu ovog zakona".

Stav (6) mijenja se i glasi: „(6) Ministarstvo će, u saradnji s nadležnim organima entiteta i Brčko Distrikta BiH, započeti uspostavljanje poljoprivrednog tržišnog informacionog sistema u roku od godinu dana od dana stupanja na snagu ovog zakona“.

Stav (7) briše se.

Stav (8) postaje stav (7).

*Komisija se pojedinačno izjašnjavala o svim predloženim amandmanima i amandmane I., II., III., IV. i V. prihvatila jednoglasno, dok je amandman VI. prihvaćen sa četiri glasa „za“ i jednim glasom „protiv“.*

*Nakon toga Komisija se izjašnjavala o tekstu zakona s prihvaćenim amandmanima i usvojila ga sa četiri glasa „za“ i jednim glasom „protiv“. Također, zaključeno je da je potrebno izvršiti nomotehničku obradu teksta Zakona i ispoštovati Jedinствена pravila za izradu pravnih propisa u institucijama BiH.*

#### **Ad.5. Razmatranje Programa mjera Vijeća ministara BiH za primjenu Sporazuma CEFTA**

Uvodno izlaganje dao je Sabrija Šerifović, pomoćnik ministra vanjske trgovine i ekonomskih odnosa BiH. Istakao je da je Program mjera izradilo Ministarstvo ali uz koordinaciju sa svim drugim relevantnim institucijama kao što su instituti za standardizaciju i akreditaciju, Ured za veterinarstvo, Agencija za sigurnost hrane, Uprava za zaštitu zdravlja bilja i sl. Istakao je da se Program mjera sastoji od akcionog plana od pedeset mjera s odgovarajućim prilogima i komentara odredbi Sporazuma CEFTA.

Druga zamjenica predsjedavajuće Dušanka Majkić pohvalila je dostavljeni izvještaj, ističući da se radi o kvalitetnom dokumentu naročito kada se ima u vidu da Ministarstvo vanjske trgovine i ekonomskih odnosa BiH nema punu nadležnost u oblasti poljoprivrede i da je bilo potrebno ostvariti veoma široku koordinaciju i saradnju s drugim institucijama na izradi ovog programa mjera. Dodala je da Ministarstvo treba nastaviti s koordinacijom i u procesu provođenja mjera koje su također u velikom obimu u nadležnosti različitih institucija. Izrazila je zadovoljstvo što su, zahvaljujući angažiranju Ministarstva vanjske trgovine i ekonomskih odnosa BiH, subvencije za poljoprivredu značajno povećane, mada je to naravno i dalje nedovoljno. Predložila je da Komisija predloži Domu naroda da donese zaključak da se Program mjera usvoji kao i zaključak da se zaduži Vijeće ministara BiH da jednom u pola godine informira Parlamentarnu skupštinu BiH o provođenju CEFTA Sporazuma i eventualnim problemima u njegovoj primjeni.

Adem Ibrahimpašić je istakao da će mnogo ozbiljniji problem za bh. privredu biti veoma skoro potpisivanje Sporazuma o stabilizaciji i pridruživanju, kada će početi ukidanje carina prvo na sirovine i repromaterijale, pa onda i na finalne proizvode. Dodao je da naši izvoznici nisu ugroženi samo od CEFTA-e, odnosno od strane konkurencije, već vrlo često od nepovoljnih zakonskih rješenja za domaće proizvođače. Naveo je kao primjer potrebu da se što prije donese novi zakon o carinskoj tarifi kako bi se domaći proizvođači oslobodili carina na uvozne repromaterijale.

Nakon rasprave, Komisija za vanjsku i trgovinsku politiku, carine, saobraćaj i komunikacije Doma naroda Parlamentarne skupštine BiH jednoglasno je odlučila da Domu naroda Parlamentarne skupštine BiH predloži da donese sljedeće zaključke:

1. *Usvaja se Program mjera Vijeća ministara BiH za provođenje CEFTA Sporazuma.*
2. *Zadužuje se Vijeće ministara BiH da jednom u pola godine izvještava Parlamentarnu skupštinu BiH o provođenju CEFTA Sporazuma, kao i o preduzetim ili planiranim mjerama na otklanjanju eventualnih teškoća i problema u njegovoj primjeni.*
3. *Zadužuje se Vijeće ministara BiH da Parlamentarnoj skupštini BiH dostavlja kvartalne informacije o robnoj razmjeni BiH s inozemstvom.*

#### **Ad.6. Davanje saglasnosti za ratifikaciju Fakultativnog protokola uz Konvenciju protiv mučenja i drugih okrutnih, neljudskih ili ponižavajućih postupaka ili kažnjavanja**

Kratko uvodno obrazloženje u vezi s predmetnim protokolom podnijela je Minka Smajević, stručni savjetnik u Ministarstvu za ljudska prava i izbjeglice Bosne i Hercegovine. Istakla je da su vlasti BiH već potpisnici Konvencije UN-a protiv torture i drugih okrutnih, nehumanih i degradirajućih tretmana i kažnjavanja i da su podnijele inicijalni izvještaj 2003. godine. Međutim, naponi za iskorjenjivanje torture nastavljeni su i nakon donošenja Konvencije, kroz opcionalni, odnosno Fakultativni protokol, koji je usvojila Generalna skupština Ujedinjenih naroda 2002. godine. Istakla je da je cilj ovog protokola da se uspostave mehanizmi za redovne posjete od strane nacionalnih i međunarodnih nezavisnih tijela. Potpisivanjem, odnosno ratifikacijom ovog protokola vlasti BiH omogućit će da Potkomitet Komiteta UN-a protiv torture dolazi na prostore BiH i nesmetano pristupa svim mjestima gdje su lica mimo svoje volje lišena slobode (psihijatrijske klinike, kaznenopopravne institucije, policijske stanice i sl.), tražeći sve što je protiv odredbi ovog protokola. Pored toga vlasti BiH obavezuju se također da uspostave i nacionalne mehanizme za vršenje redovnih posjeta mjestima gdje su lica lišena slobode i izvještavati da li se i na koji način primjenjuje ovaj protokol koji je sastavni dio Konvencije UN-a protiv torture..

*Članovi Komisije jednoglasno su odlučili predložiti Domu naroda davanje saglasnosti za ratifikaciju Fakultativnog protokola. uz Konvenciju protiv mučenja i drugih okrutnih, neljudskih ili ponižavajućih postupaka ili kažnjavanja*

**Ad. 7. - Davanje saglasnosti za ratifikaciju Konvencije o pristupu informacijama, učešću javnosti u odlučivanju i pristupu pravdi u pitanjima okoliša – Aarhus, Danska, 25. juni 1998.;**

**Ad. 8. - Davanje saglasnosti za ratifikaciju Sporazuma o saradnji u oblasti odbrane između Vijeća ministara BiH i Vlade Republike Grčke**

**Ad.9. - Davanje saglasnosti za ratifikaciju Okvirnog sporazuma između Bosne i Hercegovine i Evropske investicione banke kojim se reguliraju aktivnosti Evropske investicione banke u Bosni i Hercegovini**

**Ad. 10. - Davanje saglasnosti za ratifikaciju Sporazuma o kreditu između Bosne i Hercegovine, koju zastupa Ministarstvo finansija i trezora BiH, i Bank Austria Creditanstalt AG – Projekat rekonstrukcije i proširenja vodovodnog sistema u općini Posušje**

**Ad. 11. - Davanje saglasnosti za ratifikaciju Ugovora o zajmu – Reorganizacija projekta obnove elektroenergetskog sistema - između Bosne i Hercegovine i Evropske banke za obnovu i razvoj**

**Ad. 12. - Davanje saglasnosti za ratifikaciju Ugovora o amandmanu - kojim se vrše izmjene i dopune Ugovora o zajmu od 2. novembra 2000., amandmanima od 5. decembra 2001. i 23. februara 2004. – između Bosne i Hercegovine i Evropske banke za obnovu i razvoj**

*Članovi Komisije jednoglasno su odličili Domu naroda predložiti davanje saglasnosti za ratifikaciju: Konvencije o pristupu informacijama, učešću javnosti u odlučivanju i pristupu pravdi u pitanjima okoliša – Aarhus, Danska, 25. juni 1998., Sporazuma o saradnji u oblasti odbrane između Vijeća ministara BiH i Vlade Republike Grčke, Okvirnog sporazuma između Bosne i Hercegovine i Evropske investicione banke kojim se reguliraju aktivnosti Evropske investicione banke u Bosni i Hercegovini, Sporazuma o kreditu između Bosne i Hercegovine, koju zastupa Ministarstvo finansija i trezora BiH, i Bank Austria Creditanstalt AG – Projekat rekonstrukcije i proširenja vodovodnog sistema u općini Posušje, Ugovora o zajmu – Reorganizacija projekta obnove elektroenergetskog sistema - između Bosne i Hercegovine i Evropske banke za obnovu i razvoj, Ugovora o amandmanu - kojim se vrše izmjene i dopune Ugovora o zajmu od 2. novembra 2000., amandmanima od 5. decembra 2001. i 23. februara 2004. – između Bosne i Hercegovine i Evropske banke za obnovu i razvoj.*

**Ad. 13. - Davanje saglasnosti za ratifikaciju Strazburškog sporazuma o međunarodnoj klasifikaciji patenata, zaključenog 24. marta 1971., izmijenjenog 28. septembra 1979.**

Kratko uvodno obrazloženje u vezi predmetnog sporazuma podnijela je Lidija Vignjević, direktorica Instituta za intelektualno vlasništvo Bosne i Hercegovine. U svom obraćanju apostrofirala je ključne razloge zbog kojih se predlaže ratifikacija ovog sporazuma. Jedan od razloga jesu obaveze BiH na njenom učlanjenju u Svjetsku trgovinsku organizaciju, gdje se BiH obavezala da će uskladiti svoje zakonodavstvo sa TRIPS-om. Kao drugi razlog istakla je Ugovor o saradnji između Vijeća ministara i Evropske patentne organizacije iz 2004. godine, gdje je BiH ušla u sistem Evropskog patenta pod određenim uvjetima. I konačno važan razlog je i činjenica da Institut za intelektualno vlasništvo BiH već primjenjuje, od 1996. godine međunarodnu klasifikaciju patenata koja je upravo uspostavljena ovim sporazumom.

*Članovi Komisije jednoglasno su odlučili predložiti Domu naroda davanje saglasnosti za ratifikaciju Strazburškog sporazuma o međunarodnoj klasifikaciji patenata zaključenog 24. marta 1971., izmijenjenog 28. septembra 1979..*

**Ad. 14. - Davanje saglasnosti za ratifikaciju Evropske konvencije o nezastarijevanju zločina protiv čovječnosti i ratnih zločina, Strazbur, 25. januar 1974.**

U vezi ratifikacije ove Konvencije sjednici je prisustvovala Helena Tavra, stručni savjetnik u Ministarstvu pravde Bosne i Hercegovine. Predsjedavajuća Komisije Alma Čolo je naglasila da je prosto neshvatljivo da BiH još uvijek nije ratifikovala ovu konvenciju koja je iz 1974. godine.

*Članovi Komisije jednoglasno su odlučili predložiti Domu naroda davanje saglasnosti za ratifikaciju Evropske konvencije o nezastarijevanju zločina protiv čovječnosti i ratnih zločina, Strazbur, 25. januar 1974.*

#### **Ad. 15. - Davanje saglasnosti za ratifikaciju Konvencije o zaštiti nematerijalnog kulturnog naslijeđa (UNESCO), Pariz, 17. oktobar 2003.**

Kratko uvodno obrazloženje u vezi predmetne Konvencije podnijela je Biljana Čamur, pomoćnik ministra u Ministarstvu civilnih poslova Bosne i Hercegovine.

*Članovi Komisije jednoglasno su odlučili predložiti Domu naroda davanje saglasnosti za ratifikaciju Konvencije o zaštiti nematerijalnog kulturnog naslijeđa (UNESCO), Pariz, 17. oktobar 2003.*

#### **Ad. 16. - Razmatranje informativnog dokumenta Vijeća Evrope - Bosna i Hercegovina: Izvršavanje obaveza i provođenje postprijemnog programa saradnje**

Kratko izlaganje u vezi predmetnog dokumenta Vijeća Evrope dao je Edin Šehić, šef odsjeka za Evropsku uniju i Vijeće Evrope u Ministarstvu vanjskih poslova BiH. Istakao je da se radi o izvještaju koji je dostavila Kancelarija Vijeća Evrope i da on nije aktuelan. Najavio je skoro dostavljanje redovnog godišnjeg izvještaja Vijeća Evrope, koji će biti dostavljen svim relevantnim institucijama u BiH i to ne samo na znanje nego da bi se donijele i određene mjere.

Gđa. Majkić je u svom izlaganju istakla da se radi o materijalu koji više uopšte nije aktuelan i da je potrebno da isti Komisija samo primi k znanju, a da se detaljnija rasprava vodi tek nakon što bude dostavljen novi godišnji izvještaj. Ovakav stav podržala je i predsjedavajuća Komisije Alma Čolo.

*Nakon obavljene rasprave Komisija je jednoglasno primila k znanju Informativni dokument Vijeća Evrope i jednoglasno odlučila da predlaži Kolegiju Doma naroda da se isti ne razmatra na sjednici Doma naroda s obzirom na navedenu činjenicu da je predmetni dokument zastario odnosno da uskoro slijedi dostavljanje novog izvještaja Vijeća Evrope.*

#### **Ad.17. - Razmatranje izvještaja s putovanja:**

- a) **Izvještaj o bilateralnoj posjeti delegacije Parlamentarne skupštine BiH Nacionalnoj skupštini Republike Kube, od 22. do 26.3.2008.**
- b) **Izvještaj o učešću na Crans Montana Forumu u Bahreinu, od 7. do 11.4.2008.**

*Članovi Komisije za vanjsku i trgovinsku politiku, carine, saobraćaj i komunikacije Doma naroda jednoglasno su primili k znanju izvještaje s putovanja.*

#### **Ad.18. - Tekuća pitanja**

**a) Razmatranje informacije Ministarstva vanjskih poslova BiH o proceduri zaključivanja Sporazuma o stabilizaciji i pridruživanju (prije i nakon potpisivanja, odnosno stupanja Sporazuma na snagu)**

Informaciju je pripremio Ministarstvo inostranih poslova BiH na osnovu diplomatskih kontakata i korespondencije Misije BiH pri EU i ona sadrži pregled proceduralnih koraka u narednim aktivnostima na zaključivanju Sporazuma o stabilizaciji i pridruživanju.

*Članovi Komisije su se upoznali sa Informacijom i istu jednoglasno primili k znanju.*

**Ad.19. - Razmatranje prijedloga zaključaka delegata Doma naroda predloženih na 8. zajedničkoj sjednici oba doma PSBiH u vezi sa razmatranjem tačke Poslovanje Javnog RTV servisa BiH i mjere za prevladavanje stanja utvrđenog revizorskim izvještajima o finansijskom poslovanju Javnog RTV servisa BiH za 2005. i 2006. god.**

Predsjedavajuća Komisije je na početku podsjetila na dopis Kolegija doma naroda PSBiH kojim je zadužena Komisija za spoljnu i trgovinsku politiku, carine, saobraćaj i komunikacije Doma naroda PSBiH, da razmotri i pripremi prijedloge zaključaka delegata Doma naroda PSBiH predložene na 8. zajedničkoj sjednici oba doma PSBiH (u vezi sa razmatranjem tačke Poslovanja Javnog RTV servisa BiH i mjera za prevladavanje stanja utvrđenog revizorskim izvještajima o finansijskom poslovanju Javnog RTV servisa BiH za 2005. i 2006. godinu) za narednu sjednicu Doma naroda koja će se održati u četvrtak 15. maja. Dalje je konstatovala da dopis Kolegija Doma naroda kojim se traži da Komisija razmotri zaključke koje su podnijeli delegati iz Doma naroda a ne i poslanici iz Zastupničkog doma, ne odražava tok i zaključke rasprave sa 8. zajedničke sjednice održane 23.4.2008. Ovo prije svega iz razloga što neki od delegata nisu smatrali za potrebnim da ponavljaju zaključke koje su predložile njihove stranačke kolege iz Zastupničkog doma. Navela je primjer prijedloga zaključaka koji je predložio Klub SDA, gdje su u njihovom formulisanju na zajedničkoj sjednici oba doma PSBiH učestvovali i delegati Doma naroda koji su članovi te stranke.

Druga zamjenica predsjedavajuće gđa. Majkić je iznijela prijedlog da Komisija sve prijedloge zaključaka delegata uputi Domu naroda na izjašnjenje uz mogućnost da se na sjednici predlože i novi zaključci. Dodala je da ne bi željela da Komisija uzme sebi za pravo da isključi neke od zaključaka koji bi možda na sjednici Doma mogli biti prihvaćeni.

Predsjedavajuća komisije je predložila da ipak Komisija glasa o svakoj tački predloženih zaključaka i izrazila bojazan da u suprotnom Dom može da kaže da Komisija nije ništa uradila.

Prvi zamjenik predsjedavajuće g. Vidović je takođe mišljanja da su kolegiji oba doma htjeli prebaciti odgovornost na komisije. Međutim, istakao je da je dobro da se u ovom slučaju radi samo o dva prijedloga koji se tiču Doma naroda i ove komisije. Predložio je dalje, s obzirom da su zaključci podneseni na zajedničkoj sjednici, da bi ih trebalo korigirati u smislu da se prilagode za sjednicu Doma naroda, odnosno umjesto Parlamentarna skupština treba staviti Dom naroda. Podržao je ideju da se svi zaključci upute Domu na izjašnjenje jer se može desiti da neki od zaključaka ne bude prihvaćen na Komisiji a da bude obnovljen na sjednici Doma naroda.

Delegat Slobodan Šaraba je podržao izlaganje gđe. Majkić i g. Vidovića i predložio da odgovor Domu bude da je Komisija razmotrila zaključke i pripremila ih za sjednicu Doma naroda, i predlaže da se Dom o njima izjasni. Dodao je da su npr. zaključci g. Filipovića prihvatljivi za njega ali da zaključci g. Ibrahimašića nisu, ali predlaže da se ipak o tome umjesto Komisije izjasni Dom naroda.



Nakon provedene rasprave Komisija za vanjsku i trgovinsku politiku, carine, saobraćaj i komunikacije Doma naroda Parlamentarne skupštine Bosne i Hercegovine je jednoglasno prihvatila sljedeći zaključak:

*S obzirom na ozbiljnost predloženih zaključaka Komisija nije mogla izvršiti selekciju odnosno isključiti bilo koji od podnesenih prijedloga zaključaka te iste upućuje Domu naroda i predlaže da se o svakoj tački podnesenih zaključaka pojedinačno izjasni.*

Sjednica Komisije završena je u 14:15 sati.

Sekretar Komisije  
za vanjsku i trgovinsku politiku,  
carine, saobraćaj i komunikacije  
Nenad Pandurević

Predsjedavajuća Komisije  
za vanjsku i trgovinsku politiku,  
carine, saobraćaj i komunikacije  
Alma Čolo